



Chësta ultima dumënia ai 13.03.2016 éi gnü organisé da pêrt dl' Uniun dl Sport Amatoriala da La Val na gara de schi alpinism in record de Alexander Ellecosta y Manuel Moling sön Armentara.

Adüm al Memorial por Alexander Ellecosta, ruvé bel a süa cuarta ediziun, él gnü organisé ince na gara dla lüsa, por recordé le jogn atlet Manuel Moling, che ne s'á lascé dan da n'ann. Tratan che i atlec ê sön trù cun i schi da tourn por la gara tradizionala da Spëscia cina sön Armentara, ê i atlec dla lüsa che se mosorâ sön la bela pista sot la ütia „Ranch da André“, arjignada ca dala seziun lüsa cun l'aiüt dl giat.

Al start dales 10:00 ite a Spescia se él prejentè plö o manco 20 partezipanéc, da chi plö determinà a fà le miù tēmp, a chi che à orü se lascè plö dlaurela y se gode le bel paesaje. Laprò ince na categoria da jì a pé, por chi che á urü slat ó plö cun calma. Le trù dla gara é plö o manco resté chël di agn denant, cun le start sura Spescia y le travert sò dala ütia “Ranch da André” sön Armentara, daulache dô da 40 menüc é spizurá i atlec plö asvelc. Le miú tēmp dl dé é gnü arjunt da Pescollderung Albert de Badia, che pó mostré sò le tēmp de 39'35.88. Laprò él ince gnü premié le tēmp ideal che ti va in chësc ann a Moling Armin da Longiarü che cun só tēmp de 53'29.90 ti é ruvé plö dlungia (tēmp ideal: 53'33.26).

La novité da chësc ann é sambëgn stada la gara dla lüsa tignida nia massa dalunc dla traversd di schi. Grana é stada la partezipaziun, cun 28 atlec al start. Düc i atlec à podü porvé fora daimprüma la pista, por se studié jö les ôtes strëntes y ciafé confidënza. Püch dô era spo piada ia, düc i atlec à garejé te döes manche. Ala fin cun la soma di tēmps él gnü premié le miú: David Moling fej le tēmp de 34.98 y se aiudichëia insciö le pröm post. Pro les ëres él Brunner Shamir che ti l'astica a dütes cun le tēmp de 37.68. Ince pro chësta competiziun él gnü premié le tēmp ideal, che vëgn surandé a Miribung Martin cun le tēmp de 51.15 (tēmp ideal:51.02)

Bel plan é ince spo les mëses pro ütia che se é implides de jënt, ruvada adalerch da deplö païsc dla Val Badia. Canche düc é rovà sò y s' à metü jö pro mësa, él gnü tignì la Santa Mëssa da Siur Franz Sottara, abelida dal cor SYN da La Val, a chisc n ringraziamënt particular. Dedô él spo stè vigni atlet che à ciafé val da mangé y da bëre

y dales 14:00 ti éi gnü surandè da pêrt dl president Alex Alton, Diego Tschaffert, Toni Ellecosta y Otmar Moling i pesc
ai atlec
por i miûs tēmps.
Ala fin dla premiaziun ti éi ciamò gnü surandé na picera recordanza ala familia Ellecosta y ala familia Moling.

Ringraziè uressun düc chi che à daidé organisé l' evënt y düc chi che é gnüs adalerch por stè adüm y a insciö daidé abelì la festa.

Por odèi düc i resultac dla gara de schi da tourn: [tlassifica gara schi](#)

Por odèi resultac dla gara dla lüsa: [tlassifica gara lüsa](#)





















Einladung zur 2016-2017 Alpinen Wintersportmeisterschaft der LKS Armentara